


# MBK laksana parkir digital sepenuhnya 1 April depan

Oleh **Asrol Awang** - Januari 1, 2024 @ 11:59am  
[bhnews@bh.com.my](mailto:bhnews@bh.com.my)



Penggunaan kupon parkir akan berakhir 31 Mac depan. - Foto NSTP/Asrol Awang

**KUANTAN:** Majlis Bandaraya Kuantan (MBK) akan melaksanakan sistem pembayaran parkir digital sepenuhnya pada 1 April depan, sekali gus menamatkan penggunaan kupon parkir.

Ketua Seksyen Perhubungan Awam dan Korporat MBK, Norkamawati Kamal, berkata penggunaan kupon parkir secara bergores itu akan tamat pada 31 Mac ini.

Katanya, pemilik kenderaan boleh memuat turun aplikasi mudah alih Pahang Go dan membuat pembayaran secara dalam talian.

"Pengguna akan dimaklumkan sejurus sebelum tamat masa parkir dan boleh terus menambah masa dengan membuat bayaran yang diperlukan.

"Mereka yang tidak mempunyai telefon pintar atau aplikasi parkir, boleh membuat pembayaran di terminal yang disediakan dengan memasukkan nombor pendaftaran kenderaan mereka.

"Setakat ini, terminal parkir disediakan di kawasan parkir di daerah ini bagi memberikan kemudahan kepada pemilik kenderaan," katanya ketika dihubungi hari ini.

Difahamkan, sistem pembayaran parkir digital itu sepatutnya diperkenalkan mulai hari ini tetapi ditangguhkan bagi membolehkan mereka yang telah membeli kupon dapat menggunakannya sehingga 31 Mac depan.

Sementara itu, Norkamawati menasihatkan mereka yang mempunyai kompaun parkir supaya merebut diskaun bayaran yang ditawarkan sehingga 31 Mac depan sempena ulang tahun ketiga status bandar raya Kuantan.

Katanya, semua kompaun trafik yang dikeluarkan sebelum 1 Ogos tahun lalu layak mendapat diskaun istimewa kecuali bagi mereka yang mempunyai notis mahkamah.

"Kadar diskaun istimewa ditawarkan serendah RM5 dan pemilik kenderaan yang masih belum menjelaskan kompaun boleh berbuat demikian," katanya.